

袁州府志卷之十

藝文一 詔令表狀

御筆手詔

石刻在府治儀門左

上有道揆下有法守上行而下效則政脩而民安朕奉承先志述而行之靡有遺舉又更法定令布在天下凡以爲民而已吏怠不虔輒因緣爲姦託法以便私倚令以搔衆法以便民而反戾於民豈朕志哉蓋部使者廢於舉察州縣苟簡無愛民之心有害民之意宜令諸路監司悉力奉行有懷姦廢法不如令者按罪以聞仍令

袁州府志卷之十

御史臺體訪彈奏

袁州今月初四日准尚書刑部符准崇寧四年九月二十三日勅節文御筆手詔奉 聖旨摸本行諸路各於監司及州軍長官廳刊石安立遵守施行本部今打造到摸本御筆手詔一本裱背成軸隨牒前去并准小貼子十月二十三日奉 聖旨並用金填不得摹打違者以違制論石本州今依准 勅命指揮於長官廳刊石安立遵守施行崇寧四年十二月初四日朝奉大夫知袁州軍州管勾學事兼管內勸農

事騎都尉借紫臣周允

御筆手詔

石刻在儀門右

朕親御路朝首興教化士風所繫尤務作新比年以來
習尚澆漓文氣卑滌純厚典實視昔歎焉豈涵養之未
充抑薰陶之或闕咨爾訓迪之職毋拘內外之殊各究
乃心俾知所嚮矯偏適正崇雅黜浮使人皆君子之歸
如古者賢才之盛副予至意惟爾之休 付三省

皇帝臨御之三年銳情經術緝熙聖學萬幾餘暇親
灑宸翰顧謂士風文氣視古少殊宜懋迪而申敬之

袁州府志卷之十

二

蓋嘉與薄海內外興起治功形于細書傳之副墨播
告天下德至渥也臣玆遠職在侯服獲親率僚案舞
拜明詔庶幾精白承休廣宣睿指俾矜佩沾筆之習
自此觀感丕變黜漓還醇返薄歸厚以無負

聖天子之丕訓易不云乎觀乎天文以察時變觀乎
人文以化成天下文者貫道之器也詩不云乎倬彼
雲漢為章于天周王壽考遐不作人人才之盛治功
所由以超越也堯言誕布黎獻於躍一洗舊習日異
月殊將見列於紳綬者無非恂恂質實之風視周詩

作人之詠其奚愧發于詞藻者無非渾渾典雅之氣
視羲易化成之象其何歉旋乾轉坤跨唐軼漢實繇
茲始則煥乎雲章之頒非可視為故常之典矣謹拜
手臨摹奎畫勒諸琬琰欽襲賜本藏于金匱於萬斯
年祇奉無斁臣并遠不揆蕪淺敢昧死陳述盛際著
于下方寶慶三年閏五月望朝請大夫直華文閣權
知袁州軍州兼管內勸農營田事借紫臣曹并遠百
拜恭書

牧民訓

石刻在
儀門內

袁州府志卷之十

三

惟天生民惟君司牧都鄙盈區分劃九服乃建州伯此
維與宅民吾同胞咨爾保息朕茲念茲用簡畀尔思昔
藝祖紫雲一誓曠焉牧養言如天地爾念我悉爾心祇
祇兢兢迺惠迺康惟廉惟平惟爾典常視民如身視郡
如家視屬縣如子是可以為民父母矣勉旃愈往各勤
我班瑞之分命 付三省

皇帝臨御之七年念我土宇惟自下民民之父母州
牧侯伯渙頒一札誕告萬方謹爾侯度無俾民憂雲
漢昭回莫不震疊臣安之暫司郡寄親率僚案舞拜

綸恩竊惟聖經曰民惟邦本本固邦寧又曰欲王以小民受天永命大哉王言以民牧為訓所以培植邦本祈天永命者至矣予小臣敢不益礪廉平以推康惠敬摹奎畫勒諸琬琰使後之人知我宋萬年惟王惟在子子孫孫永保民云臣安之不揆蕪淺輒昧死陳述盛際著于下方咸淳六年四月日朝散郎添差通判袁州軍州兼管內勸農營田事賜緋魚袋暫護州印臣蕭安之百拜恭書

袁州刺史謝上表

韓愈見名宦

袁州府志卷之十

四

臣某言臣以去年正月上疏論佛骨事先朝怒臣愚直不加罪自刑部侍郎貶授潮州刺史伏遇其年七月十三日恩赦至其年十月十四日准例量移改授袁州刺史以今月八日到任上訖臣某誠懼誠喜頓首頓首伏以州小地狹稅賦及時人安吏循閭里無事微臣惟當布陛下惟新之澤守國家大平之規勸以耕桑使無怠惰而已臣以愚陋無堪累蒙朝廷獎用掌誥面掖司刑南宮顯榮頻煩稱效疇茂又蒙赦其罪累授以方州德重恩私身微命賤無階荅謝惟積慙惶無任感恩

慚惕之至謹差軍事副將郝泰奉表陳謝以聞

賀皇帝即位表

臣某言伏聞皇帝陛下以閏正月三日虔奉遺詔昭升大位天地神祇永有依歸華夏蠻貊永有承事神人交慶日月貞明臣某誠歡誠喜頓首頓首臣聞王者必為天所相為人所歸上符天心下合人志然後奄有四海以君萬邦伏惟皇帝陛下承列聖之丕績當中興之昌運爰自主營春宮齒曾國學孝友之美實形四方英偉之姿久動群聽及初嗣位遐邇莫不歡心爰降詔書老幼或至垂泣舉用俊乂流竄奸邪雖虞舜之去四兇舉十六相不能過也天下翹首以望太平天下傾心以觀至化臣某誠懽誠喜頓首頓首臣聞昔者堯舜以吁嗟君臣相戒以致至治周文王以憂勤日中不食以和萬民故能澤流無窮名配日月伏惟皇帝陛下儀而象之以永多福天下幸甚天下幸甚臣往因言事得罪先朝宇麗遠方拘限條制不獲奔走稱慶闕庭無任歡欣踊躍感恩戀闕之至謹奉表以聞

賀赦表

臣某言伏奉二月五日制書大赦天下常赦所不原者咸蒙除罪與之更始令得自新恩浹幽明慶溢寰海臣某誠懽誠喜頓首頓首臣聞王者必於嗣位之始降非常之恩所以象德乾坤同明日月伏惟皇帝陛下文思聰明聖神睿哲發號出令雲行雨施懼刑政之或差憐鰥寡之重困知事久之滋弊慮法詭之益奸罪人悉原墜典咸舉生恩既及於四海和氣自充於八紘臣某誠懽誠喜頓首頓首臣往因論事獲譴海隅旋沐朝獎待罪山薨未離貶竄之地忽逢曠蕩之恩踊躍欣歡實倍常品限以官守不獲隨例稱慶闕庭無任感恩戀闕之至謹奉表陳賀以聞

賀冊皇太后表

臣某伏承閏正月二十七日皇太后光膺令典受冊宮闈歡心始自於內朝孝理遂形於寰海臣某誠歡誠喜頓首頓首皇太后夙贊先皇躬成至化誕生明聖續繼鴻休華丕實贊於軒圖文母有光於周道恭惟懿德克配前芳皇帝陛下出震承乾垂衣御極式展臣子之念以明教化之源禮命載崇華夷同慶臣待罪外薨不獲

隨例稱賀闕庭無任踊躍欣歡之至謹奉表賀以聞

賀慶雲表

臣某言臣所領州今月十六日申時有慶雲見於西北至暮方散臣及舉州官吏百姓等無不見者五采五色光華不可徧觀非烟非雲容狀詎能詳述抱日增麗浮空不收既變化而無窮亦卷舒而莫定斯為上瑞實應大平臣某誠歡誠喜頓首頓首謹按沈約宋書云慶雲五色者大平之應又據孝經援神契曰王者德至山陵則慶雲出故黃帝因之以紀事虞舜由之而作歌又按

素州府志卷之十

七

季夏六月土王用事其日景戌亦主於土西北方者京師所在土為國家之德祥見京師之位既徵於古又驗於今伏惟皇帝陛下德合覆載道光軒虞嗣位之初禎繼至昇平之符既兆仁壽之域以躋微臣往在先朝以論事得罪身居賤黜之地目覩殊常之慶拊躍欣幸實倍常情伏乞宣付史官以彰聖德所致瞻戀闕庭心魂飛馳無任欣拊踊躍之至謹差某官奉表陳賀以聞

進仰山瑞禾圖表及宋大雅十三章 張商英

臣近上表進袁州仰山瑞禾蓋春秋書大有年乃魯國

一侯之事今天下稔而禎祥發於嘉穀則春秋所書何足道哉伏蒙聖恩賜以詔答宸翰天文輝炤部室溫詞德意淪浹肌體臣竊於天保之詩君能下臣以成其政故臣能歸美以保其上垂之六經照之萬世臣拜首稽首對揚睿聖之不顯休命謹繪瑞禾圖作宋大雅十有三章繕寫如右上表以聞○宋大雅序引

彼脩者禾相臣報上也相臣得異禾於集雲峰下高踰九尺分布七穗是歲天下大豐粒米狼戾揚厲功蹟而作是詩也○彼脩者禾其穗七方復古所無今感格方

東州府志卷之十

八

歲在庚辰利見大人十有二祀而紀庚寅乾坤六子遇庚則新大人法天有革有因皇帝孝仁羨墻神考適追先猷三代之道炳然規模百世之寶敢弗祗從率意改造蔽自淵衷格遵熙豐法非補完熙豐是同乃戢干戈不勤遠畧煩歛是蠲冗官是削屏斥浮虛尊敦儉朴舳艦尾銜泝流通洛泉幣既平商旅雲行四民樂化迭為重輕乃踈禁網乃釋青枉派徒賜還厥解禽放戴恩和順涵泳曠蕩父子怡怡朋友交餉百度孔脩德澤滂流官知奉法吏畏先疇桴鼓不鳴奠枕靡憂職是善化有

赫臨下陰陽泰通薰蒸陶冶惠雨柔風大和塞野滂漉
百嘉芄芄禾稼帝宅中天曷知其然四方罷國咸奏豐
年豐年之象何以昭宣爰有異粟八節如鞭一本之上
雙莖相向穗葉敷榮挺拔尋丈高而不危神力扶持同
而能異濟物是宜彼脩者禾其實駢羅天子萬年本支
蕃多

謝除太守表

劉克莊

見職官

遭嘖言而去國自屏空山奉明詔以典州且叨善地已
臨封域具布詔條本起鯁生最為拙宦偶逢總攬遂忝

旁招猥塵公府之僚嘗奉便朝之對莫施螢燭禪日月
之清明雖披龍鱗覺雷霆之開霽惟小臣之孤立恃明
主以少安及速殫排尚蒙涵貸支離賦粟方此養痾象
罔得珠俄而起廢唯茲為郡舊名安靜之區與盜比隣
今亦孤危之地城空無備兵少且孱以妄庸謬分千里
之憂恐倉卒難待一朝之變而况別慈顏於膝下魂夢
屢驚旅隻影於天涯宦遊奚樂徒有君親之一念若為
忠孝之兩全茲蓋伏遇皇帝陛下奮發威靈作新吏治
謂多壘艱危之際務使民安凡錄屏臨遣之人率由聖

澤乃如臣等亦在數中臣敢不厚培本根申畫圻守長江之險與我共頤為強敵之防四境不治如之何此則微臣之罪

袁州申使狀

韓愈

使司牒州牒○右自今月二日後每奉公牒牒尾故牒字皆為謹牒字有異於常初不敢陳論以為錯誤今既頻奉文牒前後並同在愈不勝戰懼之至伏乞仁恩特令改就常式以安下情

皇帝即位降赦賀觀察使狀

袁州府志卷之十

十

二月五日恩赦今月二十四日卯時到州當時集百官僧道百姓宣示訖聖上以繼明之初垂維新之澤曲成不遺於萬物大賚遂延於四海寰宇斯泰品類皆蘇溼恩普霑遠近同慶愈以藩條有制拜賀無由不勝欣并之至謹差萍鄉縣丞李某奉狀陳賀